

Gedanke vor Präsidentin zumene bsungrige Jahr

Es komischs und vorauem sureals Jahr hei mir mit em 2020 hinger üs bracht. Es Jahr, vouer Ufe und Abe, vouer Distanzierige und doch es enang ire angere Form nöcher cho. Es Jahr mit unmögleche Situatione, wo aber de komischerwis si säubverständlech worde.

Es Jahr, wo mir ou glehrt hei ds verzichte. Verzichte uf Turnstunde, Turnfescht und Soirée, uf gmüetlichs Zämesi i grosser Rundi, uf Körperkontakt, uf Berühirige, nid ds letscht leider ou uf Bsuech vo dä Liebschte, vo Ching oder Grossching.

Es Jahr, wo üs aber ou erfinderisch het gmacht. Wie chame wo zäme si, damit mir aui Regle ihaute, und einigermasse gsorget cha fröhlech si mitenang. Mir si go spatziere, was das Zeug hält, mir hei bi Nostalgie-Challenges mitgmacht und üs so bi Lune bhaute, mir hei glachet über luschtigi Fiumli wo si hin und här gschickt worde und mir hei enang mit ufmunternde Sprüch über Wasser bhaute.

Es Jahr, wo üs aber ou zeigt het, dass so vieli Sache im Läbe, wo üs si wichtig und notwändig erschiene, letschtäntlech zwöitragig si.

D Erfahrig vo däm vergangene Johr het üs nämlech glehrt, was würklech wichtig isch. Nämlech Gsundheit, Familie und gueti Fründe. Was wär das Jahr ohni die bsungers guete Fründe gsi? Dank ihne hei mir dr Humor und Zueversicht doch nie verlore, hei chöne lache, abschaute und dr Momänt anäh, wiener äbe isch gsi.

Egau was üs ds 2021 bringt.....die Momänte wei mir bibhaute! Und die Fründschafte wärde mir fire, wenn mir wieder dörfe zäme si. Ig wünsche euch aune söttigi gueti und wichtigi Fründe.

Ds neue Jahr isch do, und no chläbt ds aute wie „Uhu“ oder angere Chläbstoff a üs. Ig hoffe druf, dass mir im 2021 dä Virus chöi so id Schranke wise, dass normale Alltag wieder mögloch isch, dass mir enang mit rote verschwitzte Chöpf wieder chöi ir Turnhaue gägeüber stoh und mir zfriede und glöst bim Momo chöi ä Pizza ässe.

Vo Härze wünsch ig euch fürs neue Jahr viu Zueversicht, Humor und Muet.
Blibet gsung!

Schwadernau im Februar 2021
Eui Präsidentin
Claudia